



МОНГОЛ УЛС
САНХҮҮГИЙН ЗОХИЦУУЛАХ ХОРООНЫ
ТОГТООЛ

2015 оны 01 сарын 14 өдөр

Дугаар 08

Улаанбаатар хот

Хорооны 2012 оны 392 дугаар тогтоолоор батлагдсан
“Жолоочийн даатгалын мэдээллийн сангийн журам”-д
нэмэлт, өөрчлөлт оруулах тухай

Санхүүгийн зохицуулах хорооны эрх зүйн байдлын тухай хуулийн 6 дугаар зүйлийн 6.1.2, Даатгалын тухай хуулийн 12 дугаар зүйлийн 12¹.7 дахь хэсгийг тус тус үндэслэн Санхүүгийн зохицуулах хорооноос ТОГТООХ нь:

1. Санхүүгийн зохицуулах хорооны 2012 оны 12 дугаар сарын 26-ны өдрийн 392 дугаар тогтоолоор батлагдсан “Жолоочийн даатгалын мэдээллийн сангийн журам”-д доор дурьдсан агуулгатай дараах хэсэг 4 дүгээр зүйлийн 4.1 дэх хэсэгт 4.1.9 дэх заалт, 6 дугаар зүйлийн 6.5 дахь хэсэгт 6.5.5 дахь заалт, мөн зүйлийн 6.6 дахь хэсэгт 6.6.6, 6.6.7, 6.6.8, 6.6.9, 6.6.10 дахь заалтууд, 7 дугаар зүйлийн 7.1 дэх хэсэгт 7.1.8 дахь заалт, 8 дугаар зүйлийн 8.1 дэх хэсэгт 8.1.5 дахь заалт, 9 дүгээр зүйлийн 9.2 дахь хэсэгт 9.2.9 дэх заалт, 10 дугаар зүйлийн 10.1 дэх хэсэгт 10.1.3 дахь заалтыг тус тус нэмсүгэй:

1/ 4 дүгээр зүйлийн 4.1 дэх хэсгийн 4.1.9 дэх заалт:

“4.1.9. Жолоочийн даатгалд даатгуулагч нь даатгалын зуучлагчаар дамжуулан даатгалын гэрээ байгуулсан бол энэ журмын 4.1.1-д заасан мэдээллийн тухайн даатгалын гэрээнд хамаарах хэсгийг даатгалын зуучлагч.”;

2/ 6 дугаар зүйлийн 6.5 дахь хэсгийн 6.5.5 дахь заалт:

“6.5.5. Мэдээллийн сангийн аливаа мэдээллийг хувиран тараах, худалдан борлуулах, ухуулга сурталчилгааны болон бусдын нэр төр, ажил хэргийн нэр хүндэд халдах зорилгоор ашиглах.”;

3/ 6 дугаар зүйлийн 6.6 дахь хэсгийн 6.6.6, 6.6.7, 6.6.8, 6.6.9, 6.6.10 дахь заалт:

“6.6.6. Холбоо мэдээллийн сангийн цахим өгөгдлийг хадгалж буй сервер компьютер, тоног төхөөрөмжийг өөрийн байранд болон мэдээллийн технологи, шуудан, харилцаа, холбооны асуудал эрхэлсэн төрийн захиргааны байгууллагаас баталсан журмын дагуу “Үндэсний дата төв” УТҮГ-т зориулалтын дагуу тус тус байршуулна;

6.6.7. Програм хангамж нь энэ журмын 6.6.6-д заасан сервер компьютерүүдтэй нэгэн зэрэг шууд холбогдон ажиллах боломжтой байх ба дараах үндсэн шаардлагуудыг хангасан байна. Үүнд:

000519

6.6.7.1. Мэдээллийн сан руу хандсан хандалтын түүх /log/-ийг “Үндэсний дата төв” УТҮГ-т байрлаж буй серверээс ямар ч тохиолдолд устгах болон өөрчлөлт оруулах боломжгүйгээр програмчлагдсан байх;

6.6.7.2. Програм хангамж нь хэрэглэгч бүрийн хандалтын түүх, мэдээллийн урсгал, сервер компьютерүүдийн санах ойн сул зай, мэдээллийн санд хадгалагдсан бүх мэдээллийн тоо, хэмжээ зэрэг мэдээллийг багтаасан тайлан /report/-г долоо хоног бүр автоматаар гарган цахим хэлбэрээр сервер компьютерт хадгалдаг байх;

6.6.7.3. Програм хангамжид нэвтрэн ажиллаж байгаа хэрэглэгчийн тооноос үл хамааран гацалтгүй, найдвартай ажиллагаатай байх, гацалт үүссэн нөхцөлд мэдээллийн нууцлал, бүрэн бүтэн аюулгүй байдлыг хангасан нөөц серверт холбогдон ажиллах боломжтой байх;

6.6.7.4. Гадны халдлагаас сэргийлэх өндөр түвшний хамгаалалттай байх;

6.6.7.5. Програм хангамжийг системийн ачаалал даах чадвар, гадны халдлагаас сэргийлэх систем, мэдээллийн санд их хэмжээний өгөгдөл хадгалах боломж зэргийг мэргэжлийн байгууллага эсхүл Холбооны дотоод нөөц бололцоогоор шалгаж тестлэсэн байна.

6.6.8. Мэдээллийн сангийн цахим мэдээлэл, програм хангамж, сервер компьютерийн үйлдлийн систем нь сүүлийн үеийн, олон улсад түгээмэл ашиглагддаг, өндөр түвшний хамгаалалт бүхий ашиглалтын албан ёсны эрхтэй өгөгдлийн сан, програмчлалын хэл дээр бүтээгдсэн байна.

6.6.9. Програм хангамжийн эх код /source code/-ыг Хороонд цахим хэлбэрээр хадгалах бөгөөд Холбоо програм хангамжийн үйл ажиллагааг шинэчлэн өөрчлөх, сайжруулах зорилгоор эх кодоод өөрчлөлт оруулах тохиолдолд Хорооноос зөвшөөрөл авна.

6.6.10. Програм хангамжид дараах 4 түвшний хэрэглэгчийн эрхээр нэвтрэнэ:

6.6.10.1. нэгдүгээр түвшин: “Админ эрх” -энэ хэрэглэгчийн эрх нь ганц байх ба нэвтрэх нэр, нууц үг нь зөвхөн Хорооны Даатгалын газрын даргад хадгалагдаж, албан хэрэгцээнд зөвхөн мэдээллийн сангаас хайлт хийх, II түвшний хэрэглэгчийн эрхийг түр хаах, буцаан нээх, нууц үгийг солих эрхтэй байна;

6.6.10.2. хоёрдугаар түвшин: “Мэдээллийн сангийн зохицуулагчийн эрх” –энэ хэрэглэгчийн эрх нь Холбоонд хадгалагдаж, мэдээллийн сан, програм хангамжийн өдөр тутмын найдвартай ажиллагааг ханган ажиллаж, дараагийн түвшний эрхүүдийг програм хангамжийн хүрээнд удирдана, өөртэйгээ ижил түвшний хэрэглэгчийн эрх шинээр үүсгэх, устгах тохиолдолд I түвшний хэрэглэгчийн эрх бүхий этгээдээс бичгээр зөвшөөрөл авна;

6.6.10.3. гуравдугаар түвшин: “Хэрэглэгчийн түвшний админ эрх”- энэ эрх нь мэдээллийн сангийн програм хангамжид нэвтрэх эрх бүхий даатгагч, даатгалын зуучлагч тус бүрт I байх ба дараагийн шатны хэрэглэгчийн эрхийг шинээр үүсгэхээс гадна, ажлын цагийг өөрийн салбар нэгжийн ажиллах цагийн хуваарьтай уялдуулан тохируулах, 7.1-т заасан хамтран ажиллах гэрээний хүрээнд мэдээлэл нийлүүлэх, солилцох, ашиглах эрхтэй байна;

6.6.10.4. дөрөвдүгээр түвшин: “Хэрэглэгчийн эрх”- энэ эрх нь зөвхөн журмын 7.1-т заасан хамтран ажиллах гэрээний хүрээнд мэдээлэл нийлүүлэх, солилцох, ашиглах эрхтэй байна.”;

4/ 7 дугаар зүйлийн 7.1 дэх хэсгийн 7.1.8 дахь заалт:

“7.1.8. Мэдээлэл ашиглахад төлбөр төлөх эсэх, төлбөртэй бол төлбөрийг хэрхэн тооцох талаар.”;

5/ 8 дугаар зүйлийн 8.1 дэх хэсгийн 8.1.5 дахь заалт:

“8.1.5. Холбооны гишүүн бус байгууллагын мэдээллийн сангаас авч ашигласан лавлагаа, мэдээллийн төлбөрийг энэ журмын 6.1.5.1-т заасны дагуу болон 7.1.8-т заасан хамтран ажиллах гэрээний нөхцлөөр төлөхийг шаардаж төлүүлэх.”;

6/ 9 дүгээр зүйлийн 9.2 дахь хэсгийн 9.2.9 дэх заалт:

“9.2.9. Даатгалын зуучлагч нь мэдээллийн санд нийлүүлсэн жолоочийн даатгалын гэрээний нийт хураамжийн дүн нь өөрт бүртгэгдсэн дүнтэй тохирч байгаа эсэхэд хяналт тавих.”;

7/ 10 дугаар зүйлийн 10.1 дэх хэсгийн 10.1.3 дахь заалт:

“10.1.3. Мэдээллийн сангийн нийтэд ашиглуулах програм хангамжаар өөрийн даатгалын мэдээлэлд хяналт тавих.”.

2. Мөн журмын 1 дүгээр зүйлийн 1.1 дэх хэсэг, 2 дугаар зүйлийн 2.1 дэх хэсгийн 2.1.3, 2.1.4 дэх заалтууд, 5 дугаар зүйлийн 5.3 дахь хэсгийн 5.3.3, 5.3.5 дахь заалтууд, 6 дугаар зүйлийн 6.1 дэх хэсгийн 6.1.4, 6.1.5.3 дахь заалтууд, 6.5 дахь хэсгийн 6.5.2 дахь заалт, 7 дугаар зүйлийн 7.1 дэх хэсэг, 8 дугаар зүйлийн 8.1 дэх хэсгийн 8.1.2, 8.1.3 дахь заалт, 8.2 дахь хэсгийн 8.2.5, 8.2.9 дэх заалтууд, 9 дүгээр зүйлийн 9.1, 9.2 дэх хэсгүүдийн “...даатгагч,...” гэсний дараа “даатгалын зуучлагч,” гэж, 5 дугаар зүйлийн 5.1, 5.5 дахь хэсгүүдийн “...болон...” гэсний дараа “даатгалын зуучлагч,” гэж, 5.4 дэх хэсгийн “...байгууллагууд” гэсний дараа “болон даатгалын зуучлагч” гэж, 6 дугаар зүйлийн 6.1 дэх хэсгийн 6.1.5.1 дэх заалтын “...сангаас...” гэсний дараа “мэдээлэл,” гэж, 6.6 дахь хэсгийн 6.6.3 дахь заалтын “... учирсан...” гэсний дараа “болон энэ журмын 8.2.11-т дурдсан гэм буруутай ажилтны учруулсан” гэж, 7 дугаар зүйлийн 7.1 дэх хэсгийн “...солилцох,” гэсний дараа “ашиглах,” гэж, 9 дүгээр зүйлийн 9.2 дахь хэсгийн 9.2.5 дахь заалтын “Мэдээллийн...” гэсний өмнө “Даатгагч нь” гэж тус тус нэмсүгэй.

3. Мөн журмын 2 дугаар зүйлийн 2.1 дэх хэсгийн 2.1.1 дэх заалт, 4 дүгээр зүйлийн 4.1 дэх хэсэг, 5 дугаар зүйлийн 5.3 дахь хэсгийн 5.3.1, 5.3.4, 5.3.6 дахь заалтууд, 6 дугаар зүйлийн 6.5 дахь хэсгийн 6.5.1 дэх заалт, 6.6 дахь хэсгийн 6.6.5 дахь заалт, 8 дугаар зүйлийн 8.2 дахь хэсгийн 8.2.4 дэх заалт, 9 дүгээр зүйл, 9.2 дахь хэсгийн 9.2.4 дэх заалт, 10 дугаар зүйлийн 10.1 дэх хэсгийн 10.1.2 дахь заалтыг дараах байдлаар өөрчлөн найруулсугай:

1/ 2 дугаар зүйлийн 2.1 дэх хэсгийн 2.1.1 дэх заалт:

“2.1.1. “Холбогдох төрийн байгууллага” гэж Санхүүгийн зохицуулах хороо /цаашид “Хороо” гэх/, Зам, тээврийн асуудал хариуцсан төрийн захиргааны төв байгууллага, Хууль зүйн асуудал хариуцсан төрийн захиргааны төв байгууллага, Санхүү, төсвийн асуудал хариуцсан төрийн захиргааны төв байгууллага, Цагдаагийн ерөнхий газар, Замын цагдаагийн газар, Гаалийн ерөнхий газар, Татварын ерөнхий газар, Хил хамгаалах ерөнхий газар, Улсын бүртгэлийн ерөнхий газар Гадаадын иргэн харьяатын алба зэрэг төрийн байгууллагыг;”;

2/ 4 дүгээр зүйлийн 4.1 дэх хэсэг:

“4.1. Мэдээллийн санд төвлөрүүлэн нэгтгэсэн мэдээллийн үнэн зөв эсэхийг дараах этгээд хариуцна:”;

3/ 5 дугаар зүйлийн 5.3 дахь хэсгийн 5.3.1, 5.3.4, 5.3.6 дахь заалт:

“5.3.1. Даатгагч, даатгалын зуучлагч хувь хүн, хуулийн этгээд болон мэргэшсэн жолооч, С, D ангиллын жолоочтой байгуулсан, Монгол Улсын нутаг дэвсгэрээр дамжин өнгөрөх болон түр хугацаагаар орж ирж байгаа автотээврийн хэрэгслийн жолоочийн даатгалын гэрээний мэдээллийг тухай бүр энэхүү журмын 5.2-т заасан маягт, стандартын дагуу боловсруулан цахим хэлбэрээр;

5.3.4. Даатгагч 1 сар хүртэлх хугацаатайгаар байгуулагдсан жолоочийн даатгалын гэрээний мэдээллийг тухай бүр энэхүү журмын 5.2-т заасан маягт, стандартын дагуу боловсруулан цахим хэлбэрээр;

5.3.6. Даатгагч, даатгалын зуучлагчийн жолоочийн даатгалын үйл ажиллагаанд ашиглагдаж буй програм хангамж нь мэдээллийн сантай холбогдсон тохиолдолд жолоочийн даатгалын гэрээ, гэрээтэй холбогдох мэдээллийг тухайн өдөрт нь энэхүү журмын 5.2-т заасан маягт, стандартын дагуу боловсруулан цахим хэлбэрээр;”;

4/ 6 дугаар зүйлийн 6.5 дахь хэсгийн 6.5.1 дэх заалт:

“6.5.1. Холбооны ажилтан, эрх бүхий албан тушаалтан болон програм хангамжид нэвтрэх эрх бүхий этгээд нь Төрийн нууцын тухай, Төрийн нууцын жагсаалт батлах тухай, Байгууллагын нууцын тухай, Хувь хүний нууцын тухай хуулиар нууцад хамааруулснаас гадна өөр бусад байдлаар төр, байгууллага, хувь хүний нууцад хамаарах аливаа мэдээ, мэдээллийг хуульд нийцээгүй, зөвшөөрөөгүй хэлбэрээр ашиглах, бусдад тараах, задруулах;”;

5/ 6 дугаар зүйлийн 6.6 дахь хэсгийн 6.6.5 дэх заалт:

“ 6.6.5. Холбооны эрх бүхий ажилтан мэдээллийн сангийн цахим өгөгдлийг долоо хоног бүр, шаардлагатай тохиолдолд тухай бүр нөөцлөн, архивлаж /backup/ холбогдох бүртгэл хөтөлнө.”;

6/ 8 дугаар зүйлийн 8.2 дахь хэсгийн 8.2.4 дэх заалт:

“8.2.4. Хамтран ажиллах гэрээ байгуулсан даатгагч, даатгалын зуучлагчид мэдээллийн сангийн програм хангамжид нэвтрэх эрх олгох, хэрэглэгчээр бүртгэх, эрхийн зохицуулалтыг хэрэгжүүлэх;”

7/ 9 дүгээр зүйл:

“ЕС. Даатгагч, даатгалын зуучлагчийн эрх, үүрэг”

8/ 9 дүгээр зүйлийн 9.2 дахь хэсгийн 9.2.4 дэх заалт:

“9.2.4. Мэдээллийн санд нийлүүлсэн мэдээлэл алдаатай болон бүрэн гүйцэд биш шалтгаанаар мэдээллийн сангаас буцаагдсан тохиолдолд тухай бүр дахин засварлаж нийлүүлэх;”.

9/ 10 дугаар зүйлийн 10.1 дэх хэсгийн 10.1.2 дахь заалт:


“10.1.2. Мэдээллийн сан дахь даатгуулагчийн мэдээлэл нь алдаатай бол нэн даруй засварлах, шинэчлэхийг Холбоо, даатгагч, даатгалын зуучлагчаас шаардах;”

4. Журамд оруулсан нэмэлт, өөрчлөлтийг 2015 оны 02 дугаар сарын 01-ний өдрөөс эхлэн дагаж мөрдсүгэй.

5. Журамд нэмэлт, өөрчлөлт орсонтой холбогдуулан шаардлагатай арга хэмжээг авч ажиллахыг Албан журмын даатгагчдийн холбоо /Д.Цэвээнжав/-нд даалгасугай.

6. Журамд нэмэлт, өөрчлөлтийг оруулж, хэрэгжилтэд хяналт тавьж, нийтэд мэдээлж ажиллахыг Ажлын алба /Ц.Энхбаяр/-нд даалгасугай.

ДАРГА



З.НАРАНТУЯА